

摛藻堂四庫全書薈要

集部

欽定四庫全書
薈要卷一萬六千六百四十二

集部

懷麓堂集卷十三

明 李東陽 撰

詩稿十三

七言律詩

幽懷四首

雨深門巷半蒼苔
十日幽懷鬱未開
剛道官閒忙又錯
偶教身健病還來
酒杯尚藉驅除力
詩債慙非應答才

猶有舊堂堪繫馬水邊鷗鷺莫驚猜

坐看幽意滿青苔雨徑烟扉濕不開藥裹半封塵未掃
棋聲欲定鳥還來為園每課山僮業弄筆先憐稚子才
我瘦不緣詩思苦騷人相見勿頻猜

牆根老樹碧生苔門捲踈簾一半開巖影乍晴雲欲散
雷聲忽動雨還來長堤隔水疑無路瘦馬衝泥念不才
朝往暮歸緣底事祇須形影自相猜

懶携行杖踏莓苔寂寂殘樽對雨開開口祇應心獨語

閉門休問客誰來
幽居有道堪藏拙
巧宦逢時亦自才
試問白頭冠蓋地
幾人相見絕嫌猜

林屋養高

王編脩濟之乃翁以光化知縣家居受封濟之歸省分題得此以所居洞

庭山有林屋洞天之勝故云

隱君新拜紫泥牋
許住東南一洞天
老去折腰羞作縣
醉中因酒得稱仙
門高剝有裁槐地
年好多收賣橘錢
為報五湖風月道
秋來須載彩衣船

送黃汝脩舉人還太平

文選郎中世顯之子

京國趨庭見少年別來風度已凝然亦知梗概非流俗
未論簪纓有世傳坐上好書消歲月江南歸夢繞山川
桃溪大守今前輩長在春風几杖前

題敷五菊屏

先生深卧菊花叢曲几圍屏杳窕通本為紅塵辭俗眼
豈因多病怯秋風交情盡付炎涼外身計聊憑吏隱中
相過不嫌憔悴質紙應風味與君同

用沈仲律提學韻奉邀一首

行囊又掛佛堂燈可是緣詩尚愛僧江上踏泥三日屢
城南衝雪兩人曾別來事與流年異病起吾慙飽飯能
西望草堂三百步敝鞍羸馬到須登

夜坐有懷仲律

草堂寒日下虛簷露白風清此夜兼坐榻有塵僧為掃
客囊無計歲將淹詩成骨與山爭瘦老去心將玉比廉
還似鶴林蕭散地未容巾屨學陶潛

再次燈宇韻

布袍書卷擁寒燈興味蕭條頗似僧愛酒獨從醒處得
戒詩惟有病來曾幽棲借屋山人許再拜升堂稚子能
好是五湖烟水地幾時舟楫渺然登

用韻贈林蒙菴和仲律

時蒙菴以車駕郎中謝病將歸漳州

病來三月不窺簷老去心應吏隱薰萬里江湖甘獨往
一官書簿苦相淹還尋陋巷貧中樂解使貪夫去後廉
獨立乾坤雙道眼靜看魚鳥到飛潛

與仲律飲鳴治宅用原博韻

偶陪騁馬遊三日復到城南意惘然山色見如逢舊友
菊花開不厭殘年幽居地接東陵近愛客心知北海賢
猶識舊堂曾下榻隔樓風雨賦詩眠

飲士常新居和席上聯句韻

寂寞官曹似隱居清風時動一床書花應旋種欄將滿
客不頻來席尚虛詩好忽驚傳錦字酒狂真欲換金魚
多情愧有東鄰卜已辨城西款段車

送程克勤諭德歸省尚書

楊脩家世本公卿庾信文章自老成館閣盡推良史筆
君王親記講官名金函玉宸丁寧詔去馬歸舟日夜程
却倚三台看北斗鯉庭鸞掖正含情

戊戌冬至節初赴朝天宮習儀

翰林舊不習儀是歲有新旨學

士而下俱令依常參官習儀

朝天宮闕路逶迤帝遣儒臣下赤墀禮重叔孫綿藐地
恩同文德押班時五更清漏聞雞早十里紅塵恨馬遲
館局幸多閒歲月敢言筋力是吾私

寄莊孔暘二首

買斷溪南十頃烟還家無復夢朝天身如元亮歸田日
詩似東坡過嶺年蓬島謫來仙骨在釣臺高處客星懸
十年未洗紅塵耳誰聽清風石上絃

背部誅茅草蓋堂邊江種柳樹為牆舟中夢醒聞春雨
樓上詩成坐夕陽南紀壯遊餘歲月北扉遺草舊封章
清時例有逃名客見說嚴陵本姓莊

韓貫道黃門見示雪中遊泥鰍寺詩和韻一首

究轉新詩出袖間
官情幽事總予闊
山迎舊路如相約
雪到今年始放慳
地僻不妨禪客夢
歲豐先動野人顏
空慙突兀東齋坐
如聽車聲帶月還

齋居和世賞編脩韻

半夜開門雪滿坡
清吟無奈玉人何
人間路與紅塵隔
天上春隨翠輦過
靈吹下時神語寂
瓊樓高處曉寒多
笙簫本是虞廷樂
不為秋風起棹歌

文明黃門携大廟東宮郊祀慶成諸作見過和

韻一首

纖翠華箋共到門袖中烟霧尚氤氳龍筵地與天顏近
鶴駕班隨輦路分禮重圜丘春載覩歌成清廟夜還聞
鳳池雨露雖同沐似隔蓬山一片雲

次韻原博新廬有作

卜築堂高迥出曹牖風牀雨睡能牢鵠夷不語聊相忤
罇櫂多情豈見撓迂叟樂應須水竹醉翁心不在山醪
萬間廣廈君當見似說蒼生屬望勞

若虛餽匏瓜仍疊前韻奉謝

野意相看總不賒園匏雖大亦稱瓜青叢摘罷烟仍濕
翠籠擎來日半斜吟有舊題成左券酌無清酒愧西家
郎曹興味清如此絕勝春風諫議茶

曰川餽無花果答絲瓜之贈疊前韻

翠籠珍果望還賒報我真應愧木瓜采掇恐沾秋徑濕
傳看不覺夜燈斜飽知實德非虛語脫盡浮華是大家
異物清詩兩奇絕渴心何必建溪茶

楊武選輓詩

楊名仕偉文敏公之孫謫台州通判卒于途其妻建安朱氏遣使乞

詩

十載長安夢未醒離堂風雨思冥冥書隨洛下舟中犬
身逐台南水上萍衛國精靈應寂寞鄧家池館半凋零
寡妻稚子銜哀意誰作張圓死後銘

大雨次柳邦用韻二首

雨聲吹送滿城秋
委地頽雲濕欲流
環堵不藏原憲病
窮途誤作阮生愁
燒殘官燭晨猶暗
落盡庭花晚更幽

此夜兒童如見月直應狂喘似吳牛

風伯何時許放慳雨師今日不辭頑虛疑九道乾坤合
坐遣雙籠日月閒滿地瓜田惟足水幾家茅屋尚依山
官曹況切懷人意一夜清詩強破顏

士常得男疊前韻奉賀

慶協亢閭事不賒嘉期先報及時瓜門深賀客車應蒲
喜極題書字半斜周雅祝辭新故事李膺名姓舊通家
東樓若許吟詩到聯盡軒轅石鼎茶

饋瓜楊維二編脩以桃見答疊前韻

手種丹桃歲月賒
感君投我勝投瓜
來疑度索山城遠
去恐天台石磴斜
已託神仙棲壽域
敢教兒輩憚隣家
餐餘便有通靈意
不待盧仝六盃茶

饋瓜曾文甫編脩以冬瓜見答疊前韻

晚花秋蔓野堂賒
不道冬園別有瓜
未遣培苔封徑合
肯緣籬竹掛簷斜
後時豈敢為君惜
多子還應勝我家
預報明年湯餅會
嘉期須及雨前茶

若虛夜饋瓶棗疊前韻

異代神仙事不賒如瓶丹棗勝如瓜多情饋客詩兼遠
急腳携筐步半斜內苑不勞方朔射西鄰還切少陵家
白頭正有分甘興先向高堂一薦茶

汝賢饋西爪及檳榔疊前韻

漢使西還道路賒至今中國有靈爪香浮碧水清先透
片逐鸞刀巧更斜飽德未忘蒙正餧為園翻愧老樊家
因君解取南閩俗更說檳榔可代茶

九月八日與謝于喬諸公遊朝天宮有作

細草蒼苔石路重偶從西郭問仙蹤亭如逋叟長留鶴徑似陶潛但有松塵世百年能幾見洞門今夜不須封謝家屐齒應無恙擬上蓬山第一峯

是日和王世賞韻

厭見秋城捲暮沙還回仙路出西華清憐竹筍宜供飯醉挿松枝且當花閣苑烟霞非昨夢蘭亭山水似君家新詩未穩還催就紙背橫書字盡斜

和馮佩之韻

百尺樓臺四面同烟霞深鎖洞門中虛窓地迥猶含日
破帽情多不受風萬里碧山秋興遠一番涼雨夜愁空
祇應今度來差早明日花開定滿叢

和謝子喬韻

疲驂舊路不勞牽十載重遊意惘然丹竈藥成雞已化
石牆陰冷鹿猶眠仙蹤下與塵埃隔野色西來島嶼連
不似玄都易搖落秋來還有看花天

九日遊慈恩寺登前韻

偶從農夫問田塍又向禪家話葛藤久宦北南俱是客
頻來賓主更誰僧行憐馬上尋詩慣坐憶湖邊見月曾
到此蹠拋塵土累敢言清世獨無能

九日和王世賞韻

石門惟許白雲留我亦何心戀此遊竹裏行厨烟未午
水邊蕭寺葉先秋行貧覓句忘吹帽醉怯登高不上樓
詩景滿前誰會得野僧多是遠公流

九日和謝于喬韻

鶴翻風樹曉猶狂頗似任翻卧竹房石底片雲猶宿潤
竹間殘雨尚餘涼桔槔亭古荒秋草鐘鼓樓高送夕陽
猶有丹丘餘興在坐來今昨兩相忘

和李若虛韻

芋區瓜圃地相聯仄徑多從斷岸邊鄰曲望疑沽酒市
兒時憶上打魚船年華未改先驚暮風景重來不及前
更說農家少生事一番秋水沒湖田

和屠元勲韻

杖屢城南得得來寺門今日許重開溪流過雨蘋生岸
林影翻風竹映杯我醉不辭桑落酒僧高長住貝多臺
吟風賞月當年事莫作三生石上猜

題徐氏舍暉堂

家住層峯疊浪中水光山色動簾櫳紅塵地少多逢石
畫棟雲輕不受風陶徑菊松今古在米船書畫往來通
濯纓誰和滄浪曲我亦無心謝此翁

再遊慈恩寺畱僧容畫卷

軟沙幽草接芳洲
舊路重來問石頭
名似曲江題後到
身如房琯夢中遊
山迎傑閣層層見
水繞長橋曲曲流
吾祖汝師俱寂寞
相逢茶話坐消憂

韓都憲公雍輓詩

早騎驄馬出烏臺
萬里風雲亦壯哉
嶺海威名天下重
廟廊謀算古人才
寧知晚節終泉石
豈古英冤閟草萊
京國少年思識面
楚歌聲斷使人哀

諸生有作紅葉詩者愛其末句戲為補之

碧樹凋餘老更紅
強將顏色慰飄蓬
濃霜未著愁先醉
返照初回望欲空
唐苑情多何足問
吳江句好更誰工
晚來蟻穴無歸路
應恨蕭蕭西北風

醉楊妃菊次韻亨父

誰采繁花席上題
偶將名姓託唐妃
日烘花萼醺時面
雨換華清浴後衣
隅坐似邀秦國語
揮毫未放謫仙歸
欲從顏色窺生相
已落詩家第二機

後園種菊經月忽見數花用亨父韻并呈城東

賞菊諸君子

幽花種得偶相忘步轉南簷郤背堂但有芳心寧擇地
更無佳客亦宜觴登臨憶負重陽雨採掇愁沾昨夜霜
滿袖餘香試披拂晚來風力正悠揚

蘇人織蒲為茵二片置床椅間藉背及足甚宜
冬寒凌季行以書見惠道經敷五大史輒為所
留聊作小詩報季行并柬數五

輕蒲一簇軟如花巧織重鋪意未華吟處迥宜孤背倚
坐來溫愛兩趺加未沾南國佳人惠已落東瀧病叟家
幸有題封三十字慇懃畱向手中誇

冬月對菊用陳玉汝韻

搖落霜空萬木飛一枝無柰賞心微未成老圃應須學
若在南山便合歸人道秋香非昨夜天畱晚色共斜暉
陶翁可是忘機者猶自含情待白衣

與王世賞重遊朝天宮是日病卧待諸公不至

石徑苔深步屢空菊花開遍去年叢重遊誤落秋風後
舊事都消夜雨中已覺地偏非世界却憐身病是樊籠
諸公只隔瀛洲路未遣丹丘鶴夢通

和世賞韻

偶陪寒日坐空庭飯有胡麻藥有苓霜菊多情留暮色
風禽無語墮踈翎墮前藉草衣全濕石上題詩酒盡醒
莫笑山公歸太早祇緣多病想幽扁

楊應寧母安人受封詩

老去逢恩不自知半生勤儉翼成絲家如夫子長存日
身似郎君未貴時拜憶登堂晨賀早醉沾開閣夜歸遲
百年桑梓瞻依地一度生辰一獻詩

送韓貫道湖廣叅議提督武當諸宮觀

神仙官府意何如親見分符上紫虛山擁帝宮三十六
地屯兵衛五千餘人言才大難為用我愛官閒好讀書
臨別與君堪一博肯將青紱換緋魚

謝邵地官汝學餽陶鼎次韻

感君攜贈出南裝
別路相看似故鄉
詩客品題新定價
野人搏埴舊傳方
茅柴火底春風軟
骨董羹中滋味長
秋去冬來幾寒暖
且將麤糲送年光

汝學席上賦陶鼎疊前韻

山家形製朴無裝
伴我頹然入醉鄉
鄉人境最宜林下一
丈蓬何羨食前方
不辭地僻江湖遠
却愛官貧歲月長
幾見雪堂明夜火
擬從東壁借餘光

王仁輔見和雪後西華聯句用韻答之

磴雲梯雪迥分層玉殿瑣闈次第登敢向內園誇壯麗
似聞南客想炎蒸淡交情在貧應識白戰才高老定能
蛻蝶飛來誰解道當時獨有呂翁曾

再次王仁輔雪後韻

雪堂高聳玉樓層驢背寒多不柰登夜飲略教盃有酒
晨炊誰問餽無蒸長安病卧袁郎老野寺吟行賈島能
應恐出門無覓處沙頭記取屐痕曾

再次仁輔韻

曉風殘雪上階層謝眺樓頭客未登紙帳不知寒日出
硯池初覺暖雲蒸關心遠道妻孥隔作伴空齋杖屢能
斗酒繅袍吾欠此贈君空有笑言曾

分題得孔林送張廷芳巡按山東

孔林喬木蔽高空岱嶽西來泗水通萬古山川神陟降
百王封秩禮尊崇詩書世豈坑焚後俯仰吾猶覆載中
却羨東巡張侍御得先瞻拜仰遺風

徐用濟秋官和雪詩次前韻并柬仁輔

雪風吹透褐衣層望盡高臺不可登滿地茶烟猶帶濕
幾家藜火尚餘蒸江湖意氣山人老詞賦風流漢署能
塵土滿胷消不得瓊琚欲報兩無曾

再次陶鼎韻答用濟諸君

重爐高蓋擁層裝規製居然自一鄉豪客休嫌下箸處
仙家不用辟寒方味兼小市盤餐別坐共嚴城漏水長
却有好詩如拱璧搏工何意敢爭光

仁輔屢和雪韻而方石不至再用前韻督之是時

仁輔館于
方石官舍

雪裏幽懷百感層相逢聊復話年登帳中綠酒香應醉
鏡底黃精濕未蒸王子扁舟無興到謝家新句有人能
詩壇定與屏風隔夢裏高歌達未曾

李世賢侍講一產二子用瓜祝韻賀之

同官同姓跡非賒異事還應協我瓜池鳳水深相對浴
海槌枝重不勝斜縵縵周雅詩人頌袞袞徐卿積善家
畱取秋菹薦春酒向來真愛一甌茶向饋瓜世賢答云
謹當醉漬為菹以

俟他日湯餅之會
今不敢以薦茶也

再和仁輔韻

是日雪將再作

雲擁高城雪意層蒼天欲問恐難登山家未報來半足
海國還聞瘴癘蒸勝事園林誰合鬧豐年歌頌我猶能
王郎更跋何門履十二街頭遍已曾

方石堅卧累日忽與仁輔聯句見答始悟其為

合從計賦此挑之

門掩高坡最上層

方石所居名高坡巷

徑深泥滑苦難登歌殘白

雪無餘調夢醒黃梁第幾蒸季子合從元有計亞夫堅
卧豈無能何當再接星堂戰頭上同雲黑未曾

仁輔以詩見欵復用前韻并柬方石

雪裏降城百二層素車今日愧君登力効宜謂心能怯
顏赭空驚汗欲蒸謀楚似聞王翦老禦秦猶有謝安能
無端又作衝寒戰袖手惟應巧匠曾

雪再作再疊前韻聊用自詠

睡起空階薄霰層高堂片雪已先登鄭橋路隔新風景

馬館寒空舊燠蒸

馬融嘗在史館燠蒸如坐甑思陰山層冰清物祇餘陶鼎

在晚交惟有竹君能孤吟寂寞無人和時問門前客到

曾

次韻答時雍

誰是乖崖一字師須將得失寸心知君才絕我寧論倍
世事於人大忌隨是玉也須懷卞氏有金休把鑄鍾期
十年道義相看地猶落殘葩與剩枝

次韻答若虛

雪外樓高碧瓦層江南江北望中登寒愁夜壘軍聲亂
暖憶春湖水氣蒸酣飲縱教豪客醉凍吟輸却腐儒能
西堂杏酪清堪比獨坐懷人此意曾

立春後一日席上次若虛韻

地近彤樓御氣邊苑花宮柳意先傳三冬閏月留餘日
兩度春風共一年庭淺恨無投轄井酒窮須辦典衣錢
瓦杯陶鼎能留客未愧烹肥與擊鮮

再用韻促諸秋官和章

雪堂開卷坐分層自掃西階待客登盟在豈應寒似水
心煩長使熱如蒸驅車路熟朝停慣刻燭才多夜坐能
獨有東鄰老同姓為予談笑解圍曾

讀楊尚寶叔簡鄉縣懷蒙泉岳翁詩有感次韻

門戶凋餘祇弟兄憶公於此最傷情囊空始信生前計
棺蓋從他世上評古墓回車誰腹痛遺文在篋我心驚
楊時語及家集符臺老至今頭白幾向荒村問縣名

賀周原已得男再用仄祝韻

原已匏庵外甥

宜男嘉祝未云賒吉兆今符第幾瓜西海又傳桃實大
東樓初記斗杓斜桓郎未必無佳客王氏從來有外家
聞說賀筵多異品尚方新賜小團茶

題王允達中書所藏宋仲珩草書卷後

蘿山令子華川裔前後清朝兩舍人幾世通家同骨肉
數行遺墨在風塵典刑尚及吾非晚文獻猶存子未貧
江水舊多元祐鬼恐驚風浪出通津

徐用和御史墓山八首

金山埋玉

金山四面擁佳城玉樹埋時不復榮靈氣百年還造化
巖巒千古闕光精名同郭璞江心墓恨比何充地下情
欲採生芻無處奠亂沙衰草正縱橫

玉屏耀金

玉屏開日耀金精下見扶桑海色明綠翠搖空光不定
丹青照眼畫難成羊郎晚可移床對王子朝宜挂笏行
猶有舊題詩在壁十年風雨綠苔生

岡鳳翔雲

岡頭晴翠拂雲開幻作丹山鶩鷔胎五色宛從天上降
一靈真向藪中來盛時川嶽皆為瑞奕代文章可比才
應是思鄉還感舊可能重上鳳凰臺

璧池浸月

古墓前頭月一池璧紋浮動不成漪半空影落秋毫見
午夜先生老蚌知犀火不勞溫嶠照錦袍誰賦謫仙詩
舊遊回首傷心地又是烟愁雨暝時

筆架明星

筆架山形奇且牢上與列宿如相遭光華照地夜初白
蒼翠插空秋正高大年登樓手可摘杜甫上天詩更豪
鄉人翹首望山斗我亦念之心孔勞

冠峯湛露

危峯高聳似峩冠草樹蒙籠露未乾袍笏儘消狂客拜
風塵不受世人彈羽幢朝嶽雲中降鰲首當空海上看
下有白頭未死地石門空枕夜臺寒

圭田秋獲


臺府官清只俸錢十年祭有大夫田人間未耜秋風裏
路遶桑麻夕照邊見說承家須主祀况聞憂國願豐年
平泉花樹真何物猶辱先人戒子篇

茅屋時思

報德難忘寸草私多愁長廢蓼莪詩也知春雨秋霜意
猶似晨興夜寢時種得松楸成古墓採將蘋藻薦新祠
欲憑此恨東歸海江水無情去不知



懷麓堂集卷十三



總校官庶吉士臣張能照
校對官檢討臣龔大萬
謄錄監生臣李士勲

欽定四庫全書會要

集部

懷麓堂集卷十五



欽定四庫全書薈要卷一萬六千六百四十三

集部

懷麓堂集卷十四

明 李東陽 撰

詩稿十四

七言律詩

元日早朝

萬仗攢空簇綵旛杳聞人語隔香烟城頭日共雞聲起
天上春隨斗柄旋荒服五圖皆禹貢華封三祝更堯年

侍臣獨立瞻華蓋長記分班黼座前

賀歲次韻若虛秋官

撲面塵多眼亂花春來心事劇如麻九衢路塞車馬集
七貴門深雲霧遮長恠僕夫遺刺字每勞閭吏指鄰家
長安舊俗年年在又是晨雞與暮鴉

元夕和若虛韻

十里樓臺月色邊御河東畔闕西偏杯盤入市多新俗
兒女看春憶少年紫陌塵香千騎合玉堂官冷一燈懸

江南風物君休戀自有宮柑入袖傳

聞王仁輔買魚瓶俗所謂泡燈者賦此嘲之
買得長安市上春玉壺清水貯金鱗却看塵土疑無地
未掣波濤亦有神眼底功名聊比幻杖頭風月且教貧
西堂燈火元宵夜又向東風作旅人

仁輔遺鶴燈若虛有詩因次韻

不逐驂車與電輪偶來飛繞帝城春塵埃誤落空中影
烟霧虛疑夢裏身千歲有丹應化骨九臯無唳亦驚人

于公舊價休勞送自有山翁為卜鄰

仁輔魚瓶遂壞意甚不釋疊前韻慰之

白髮華燈一夜春
江南江北兩窮鱗飛騰有地歸塵土
訶護無錢役鬼神物以泡名終合盡家隨身在更何貧
清詩素壁猶堪玩休羨揚州鶴上人

李貫道學士輓詩

青霄健翼幾徊翔蜀水燕山道路長
司馬舊遊題柱晚
予瞻新命攬衣忙亦知機巧非公事可獨文章與命妨

南省北扉燈火夜向來清話正難忘

送羅大理大常擢廣東僉憲

目極蒼梧嶺外雲珠江南下海西瀆殊方貢賦諸夷接
十郡山川五嶺分漢尉官高驄馬出楚鄉家近雁書聞
郎看萬里澄清地野虎城豺浪作羣

西湖草亭詩

淮陽城外西湖好漫說杭州更潁州雲裏亂山堆寺出
雨餘春水入田流官閒了却坡翁事家在無煩范蠡舟

詩卷畫圖遊子意幾回春夢遶芳洲

方石將謁陵愧齋席上贈別一首

百里郊原眺望通又騎羸馬逐溪風官清屢伴詞林幕

方石嘗與馮孔目同行今復與方孔目往地僻休過泮水宮

昌平學有翰林行館今廢啼

鳥落花春早晚亂山殘雪路西東因君却憶中元事

中元

予與愧齋同往何限高情笑語中

送尚書黃公之南京戶部

早聽仙履下星辰帝遣南曹屬重臣財賦國須根本地

衣冠公是老人雲連闕角千山起日暖江頭萬樹春
應向栢臺逢舊吏更多魚鳥避行塵

陳玉汝得孫歸功瓜祝用舊韻賀之

祝子生孫喜更賒始知為庶勝為瓜擬分座上金錢滿
來看風前玉樹斜詩學早傳韋孟業德星偏聚大丘家
佳期忽與春爭到正及雷鳴二月茶

林亨大脩撰得第四男用舊韻賀之

莫謂三山道路賒亨大三人間仙果不論瓜筵前會客
山人

犀錢散醉裏題詩蠟炬斜三鳳豈須誇薛氏八龍今已半荀家他時細說熊羆夢夜榻畱連到幾茶

三月六日曰川宅賞接杏綠萼梅限韻

三月長安見此花東君猶戀止人家清香有月還疑暗老態無風也自斜縱飲不辭盃盡白苦吟應直鬟雙華青枝綠萼依然在憑語詩人莫誤誇

環翠軒

幽人舊住秣陵莊石徑巖扉闊草堂空霧濕衣春冉冉

野禽啼樹月蒼蒼老於江海遨遊倦閒覺山林興味長
莫向東華更東去馬頭塵土又斜陽

送趙良輔知宿松

銀臺門下見銅章前後清朝共寵光意氣古稱燕慷慨
科名今比漢賢良山多黍稌知秋熟縣有絃歌愛日長
十五年前同輩少杏花陰裏憶升堂

陸參政孟昭輓詩

高才恥作書生酸開口論事如翻瀾直遣胷中九雲夢

從教世上一邯鄲清風庭館賓客散
陸有清風館落月屋梁魂夢寒我亦平生舊青眼詩成不見但長歎

送汪寺丞歸鳳陽

園陵分祀職清專况是名家一姓聯祖似王陵元有母
官如茅氏總登仙汪二兄一為指揮一為奉祀山川地識蛟龍氣雨露恩深草木年沛上小兒今白髮當時歌曲可能傳

原博席上用擊鼓催花令戲成一詩

擊鼓當筵四座驚花枝絡繹往來輕鼓翻急雨山頭脚

花闌狂蜂燕底聲上苑枯榮元有數東君去住本無情
未誇刻燭多才思一遍須教八韻成

息菴

嵊縣王陽仲壽藏

掃開蒼翠鑿孱顏自作堂封更堵環頗似王樵為繭室
不勞齊景泣牛山悟來物理誰稱達脫盡天羈始是閒
記取平生行樂地寧論地下與人間

送陳昌舉會試畢還無錫

春風得意早還家不待長安滿路花已覺青袍同畫錦

却看銀漢有星槎
江湖廊廟皆心事
城市山林且歲華
珍重平生治安策
漢庭須召賈長沙

送徐生下第歸

誤落多才與世譏
暫將幽寂掩光輝
草玄亭上侯芭在
亨父門人也
白璧山中卞氏歸
江雁過雲寒雨暝
諸花飛雪
晚風稀庭闈
別有三公養未必
華簪勝彩衣

次韻答若虛秋官聞恤刑詔有作

西曹忽枉恤刑詩
我在閭官亦自疑
正恐災祥非獨致

敢言繁簡不同司心中自許神明鑒筆底真看造化移

今日治安還有象賈生癡淚莫深垂

送大倉俞良臣之安州學

青山騎馬入安州回首京華是舊遊豈謂功名非適意
漫將詩酒坐消憂渚芹香濕還經雨岩桂花遲總待秋
借問婁江今幾派祇應同向海東流

次韻答攸縣陳翁鉞

十年衡嶽雁書遲縱有高懷說向誰花下一壺狂李白

江頭三弄老桓伊清風坐裏時生腋黃色歸時正滿眉
尊俎肯留今日燕為君重詠白駒詩

送吳江陳知縣

曾踏長橋望大湖至今魂夢繞東吳波濤歲久魚龍化
雲霧天空島嶼孤千里風塵長送客幾人冠蓋此分符
賢勞未有登臨興不道官閒一事無

雹

黑雲驅霧忽城東萬雹飛來勢繞空和氣不成三日雨

戚棲兼助一番風山中蜥蜴真成祟海底蛟龍誤奏功
久旱不堪逢此厄幾時禾黍報年豐

次韻楊應寧久旱三首

三復來詩百感侵寂寥雲漢有遺音終風漫挾揚沙勢
畢宿空懷好雨心坐待庭苔封蟻垤夢驚潭樹作龍吟
原田已恨冬無雪更入新年恐不禁

萬里長空晦復明夜窓推枕晝還驚真看夏日流金石
不見天河洗甲兵耕穫有期空盡力流離無地可聊生

綠衣年少誰言事已識君王駐輦情

驕陽五月漸生陰病渴人方起上林周稼有風還自熟
商郊雖旱豈妨霖貧增賈客時時價苦盡農家粒粒心
杜甫不勝憂國願向來真與海波深

送陳翁歸攸用前韻一首

衡門門下好棲遲此意悠悠欲語誰風靜漁歌聞欸乃
夜涼書館聽唔咿涑川二老皆黃髮馬氏諸郎總白眉
却憶賦詩相贈地不應相送更無詩

送蕭履菴之鎮寧二首

郡佐初傳給舍名尚疑朝報未分明方驚作客天涯地
况是思君病裏情暫喜山川經野甸若為風雨住江城
春明門外陽關路細數郵籤第一程

杯酒平生幾故人送君南去獨傷神冰霜不改孤臣操
天地能容萬里身未論華戎風俗異直教夷險路頭真
東風合是無私物瘴草蠻花也自春

送履菴子鳴鳳侍父南行次韻

爾家門第足清風十載交游父子同辯論有才驚阮籍
吹噓無力送揚雄山橋樹老還多節林桂花開未滿叢
應有宦遊兼色養旅情鄉思一時空

觀仁輔林黃門宅看蓮詩戲次其韻

林舊為
庶吉士

老去愁多祇為花不堪風雨更泥沙買裁自笑貧無地
卧看誰憐醉是家江上路遙隨夢到袖中詩好向人誇
詞林舊侶風流在許贈繁香壓帽紗

次邵東曹借屋詩韻

宦路無心定卜居又從官邸駐行車園花不礙東鄰蝶
御水潛通內苑魚白石生雲當戶滿綠苔經雨上垣初
辛勤合似韓京兆十五年來未有廬

次韻秦武昌見遺之作

使君清鑒徹秋毫誤識山雞比鳳毛閉戶吟鳶慚我拙
入門下馬讓公豪文章竟作雕虫技歲月能消繼晷膏
見說詩壇高數仞空將目力送劉曹

邵東曹墮馬傷足次武昌韻

十年雙足躡詞場我亦憐君墜後傷歷塊敢誇千里俊
乘船却笑四明狂扶顛老僕空隨路學仆嬌兒更倚堂
應似崔家亭下鶯獨拳秋雨向寒塘

寄潘興化先生次韻二首

分曹去後抗章前六載塵途事惘然忙裏簿書無暇日
老來林壑有深緣清風盡掃淫祠籍遺法猶存廢寺田
略試平生經濟手聲名已許郡人傳

髫年曾趨組綬前重來公已鬢蒼然風塵望隔還山路

杖屨慚無學道緣遂有冥鴻歸碧落舊聞仙鶴產青田
明時未合逃名盡不惜文章與世傳

廷韶文敬聯句見寄疊前韻一首

日長秋館罷抽毫自在閒庭落塵毛忽有詞章傳二妙
敢將名姓託三豪心清乍可鳴金鎬肺病何因漱玉膏
身欲奮飛無羽翰始知塵路隔仙曹

鶴林書巢疊諸君韻二首

小結書林數尺巢間將露翼倚烟梢居寧擇地心常樂

力不凌雲世所嘲賀廈漫勞飛燕雀綴枝聊可藉瓠匏
周靈魯瑞非吾事任說鷄門與鳳郊

幽棲無意託聲名小榜軒居亦近情四海於身皆俯仰
一枝隨分且飛鳴山林舊侶心猶在風雨中宵夢不驚
讀罷莊生齊物論始知天地有鵬程

寄都憲桂陽朱公二首

帝命臺臣鎮五戎豸冠兼帶虎符雄廟堂出入謀謨在
嶺海華夷節制通攬轡孤城懷舊志獻俘雙闕見新功

風霜合遣為霖雨天下蒼生正憶公

鄉里長懷仰止私不才先已荷公知敢言元禮通家舊
豈恨荊州識面遲丸蠟屢傳封後藥綵毫今見寄來詩
欲知父子同朝地雲母屏前賜坐時

再疊鶴林書巢韻二首

詞林別館建深巢已避雲間第一梢鼰鼠分同堪共適
蠹魚心苦漫相嘲飛騰豈必岡千仞飲啄聊應水一匏
若遺丘園隨野性未論東郭更西郊

卜築無材懶近名暫將微物寄幽情略同莊子為言寓
敢效張華託賦鳴縱有樊籠何足累更無矰繳底須驚
羽毛欲作填河報路隔天橋尚幾程

無錫殷氏婢守節秦武昌廷韶有傳識之以詩
婦家名節本從夫殷氏分明一女奴少有清風辭外侮
老將遺業付諸孤文章郡守能為傳忠義鄉人定作模
試問衣冠塗炭地不知曾汗此顏無無錫有忠義鄉

賦得玉泉送王元勲還南京席上作

九曲峯前一派過誰將壯士挽銀河天池倒浸空中影
地脉潛通洞底波

泉南有華嚴洞洞有竅其深無底

詩骨照來先見瘦

醉顏醒後不成酡因逢玉免泉邊客

南京有玉免泉

欲鬪清冷

柰遠何

文敬聞仁甫在予坐以詩見詫因次韻并柬仁

甫

不厭緇塵染素衣此翁身跡信依依酒狂不作高陽醉
吟苦從教飯顆譏猶有舌存非是拙更無家在莫思歸

何須重訪東曹隱

文敬號東
曹隱者

風月西壇興未稀

文明生日以龍尾硯為壽并致一詩

我持龍尾溪頭石來壽鳳毛池上人清愛石將人比德
壽看人與石為鄰長留天地詩家事坐鎮浮澆靜者身
記取翰林揮翰客年年來此頌芳辰

戲效原博坡書辱詩見遺因次韻

坡老書名重雪山勁如戈鐵轉如環心同好古生差晚
力欲追君鬢恐班聊以師模歸有若敢將文行比顏般

狂言戲作皆吾過賴有新詩為訂頑

原博詩來戲予還故步再次韻

醉後揮毫力拔山玉堂觀者堵如環換羊價重街頭帖
畫虎心勞紙上班得趣豈須優比孟改繩翻愧拙於般
也知真外皆成假莫大分明點與頑

三疊韻答原博

坡書新價踊如山碱石何堪報玉環榻遍吳牋猶送錦
搥殘湘管半無斑文心捧處慙施女筆陣圍時困楚般

楚闢般伐石底老墓如可學爬沙雙手不辭頑有評蘇
宋圍緝書謂石

墓者壓蝦

原博和章不至四疊韻督之

書家風采屹如山拙匠紛紛但坐環可信龍豬元異骨誤疑鷄鶩本同班鄭師乍許三降楚墨守終能九却般聞道純綿深累鐵定藏鋒力待堅頑

原博詩有雪堂獨立語五疊韻謝之

種柿臨書葉比山空驚歲月轉如環雲間天馬誰爭步

水底山雞自照斑敢謂逢蒙曾學羿豈知為賈不容般
蘇門七字君須入我已無心起懦頑

西莊清隱

山林舊隱不知年此墅西莊次第遷桃李春風花縣外
金銀夜氣寶峯前家貧有業存書卷官在無心乞俸錢
若向水邊逢孺子可能重和濯纓篇

送李提學若虛侯僉憲公矩一首

十載同官別更同一朝分送兩青驄湖南使節經江右

浙上行船過泖東面帶冰霜生朔氣手裁桃李待春風
他年冠佩還朝地誰奏天曹第一功

遊白秉德西園次韻二首

行逐溪流過野亭望疑山色繞空冥池魚自躍非因餌
園蝶還飛不受扃傍渚幽花憐寂寞舞風踈柳愛娉婷
郎君門地清如水不待平泉石已醒

欲采黃花泛綠杯勝遊幽意兩徘徊門連甲第三家近
節過重陽六日纔高廈捲風飛燕雀短垣經雨上莓苔

松林步屢多餘興馬上新詩取次裁

送黃廷威戶部還南京

承恩寺裏勞相送宣武門前復送君北地黃花開較晚
南都綠酒夢猶醺也知錢穀能裨國漫有文章為策勲
羈旅未勝鄉里話雁行飛斷楚江雲

送陳繼昭秋官還南京

早聞天闕載星輶越客遊吳路未遙千嶂隔空還共月
兩江分海亦通潮沙堤樹繞青驄過畫省詩成蠟炬消

見說聖朝書訟少幾人清社許招邀

史千戶生輓詩

舉世無端柰死何誰能生作莖時歌漫勞莊子憂蠻蟻
且勝藤州卧薜蘿墓木又生人未老湖亭不動水空波
史官今日書名姓已附他年達士科

和張都憲謁黔國公祠韻

平江陳恭襄
侯追封于黔

將壇三世仰先登廟祀中朝覩載興賓館久辭朱履客
影堂時掃白頭僧樓中舊匣藏秋劍河上行旌見夜燈

猶有姓名傳吏卒勲勞不愧史官稱

周原已席上賦十月菊

布袍蕭索不勝涼坐愛芳心共日光何用門前看五柳
始知秋後有重陽故園栽處田應熟原已尊翁號菊處原已號菊田小
市開時藥正香自古交期須歲晚相過不敢避風霜

送呂進士卣之大名推官

清時休但愛閒官錯節真從利器看我愧孫陽曾相馬
君如仇簿暫棲鸞交情覆手炎涼易世路於人俯仰難

至竟不關儒者事百年留取寸心丹

送孫進士治知臨淮

臨淮鳳陽舊城

千里長淮繞縣東兩城佳氣往來通
封移舊地同周鎬世有遺恩比漢豐
今日兵戈皆未耜當時父老更兒童
循良合是升平事要錄書生撫字功

送蔣宗誼推官之金華

北來南去幾星霜又見分符出帝鄉
三入越山身更遠重遊京國夢難忘
也知吏法兼詩老未必才名與命妨

臺省紙今須俊傑看騎驄馬問豺狼

次韻體齋病起見寄二首

長隨待漏入金門宦况詩懷得細論劉向有才方漢閣
杜陵多病且江村防身戒久同持律愛國情深比負暄
此境定應間處識幾時傾倒向清樽

坐倚孤筇卧擁衾重門未放野寒侵疑蛇已辯杯中影
病鶴長懷海上心詩券負來應漸釋方書驗後懶重尋
燈前細認銀鈎筆不待平安報好音

壽彭詹事先生五十次諸翰林韻

宴後數日
復兼學士

彭鏗家世本神仙異代長生復此筵朝罷文鶴班始散宴回青鳥信方傳東宮地近恩兼渥南陸天長景正延記取八千從半百是公重到玉堂年

雪二首次韻彭武選性仁

冉冉瑤姬駕玉輶墮翹遺佩各飄零遙從天上諸空界巧出人間萬幻形洗墨池冰看又合衆星堂夜坐還扃美人獨立高寒外似隔蓬山數點青

造化無端類轉轍晚將恩澤慰凋零淺深欲試千林色
高下皆隨大地形羽士天壇宵擁節龍宮冰海晝開局
君心自與豐年應漸覺春迴苑樹青

雪後飲胡彥超冬官歸登席上韻二首

馬蹄衝雪叩君門坐愛飛花撲酒尊簾未卷時先作陣
展曾來處已無痕寒簷葉落蛛絲墮老樹巢傾鶴夢翻
今夕定知何夕是好風明月未堪論

醉歌聲裏夜筵收雪滿空齋擁敝裘歲事正勞商禱旱

邊心應識漢防秋
山林地僻留清賞
江海盟寒憶舊遊
坐聽蕭蕭成不寐
短窓踈竹未能休

雪晴和應寧諸君韻二首

雪後餘寒滿素蘢
坐看庭彩動星蟾
紅塵迥與東華隔
貝闕高疑上界瞻
牆外經過知馬跡
城頭指點見山尖
聚星堂上多勍敵
白戰通宵恐未厭

氷濤無聲欲墮簷
雪花何力更窺簾
山橋路滑車猶險
村市寒多酒正甜
甲第好開雲母障
貧家空照水精鹽

眼看珠玉囊中盡却恠詩人大未廉

傅曰會舉進士次汝賢文敬韻二首

曾聽干將躍冶聲又看歐劖發精英鄉邦望裏論家世
藝苑書中識姓名御墨親題金榜字宮恩新賜玉壺清
為君喜極須雄飲力盡西江萬里鯨

上林芳樹倚雲高長笑高蟾詠碧桃白戰早收天下捷
春遊不學少年豪兩蘇才擬當時重二宋名同舊史褒
應共玉堂詞翰手鳳凰池上對揮毫

齋居和舜客侍讀院署見寄韻二首

數點殘星帶碧寥五雲城闕路迢遙乘高直欲登樓坐
望遠空勞舉袂招何必關山成別夢幸將名姓託清朝
天涯回首相逢地楊柳秋風白下橋

綠槐庭館坐春風十九年前此興同未老身猶書卷裏
不眠人在漏聲中大鵬南去雲連海羣鶴西飛月繞空
燈火憶君連夕話不勝幽思滿齋宮

立春日力齋席上作

雪後餘寒尚滿城東風花柳正含情春盤淺送青絲色
晝漏遙傳玉箭聲杯酒祇供閒歲月文章應減舊聰明
西臺驄馬東關路又愧賢勞百里行

送范秋官以貞謫鳳翔判得真字

吏部擬謫廣南特改茲郡

早聞長策動楓宸十載郎官謫命新家遠漫為秦嶺客
恩深不作播州人一身且向閭時病萬事還從定後真
蕭索郡齋山樹裏坐看黃葉漸回春

次韻白宗璞員外使密雲途中遇雪

薊門春雪尚能花却望邊城路更賒應律未回燕谷煖
舞風還濕漢旌斜青山骨聳如爭瘦白雪詞工欲鬪葩
此夜宮綾寒不寐未知清景屬誰家

和楊學士先生東閣趺坐韻四首

院直初歸柳外途玉堂高坐擁雙趺應同禮席開函丈
豈有禪心到給孤聚訟漫勞今日議如尸誰見古人模
亦知戲笑皆文字聞說公才似長蘇

金馬門深入禁途紅塵無地著高趺仙人露下秋莖白

太乙燈來夜影孤禮樂百年周制作文章一代漢規模
休勞鉅筆稱燕許誰似張公可配蘇

名家簪紱是前途兩世青雲共接趺金治外看雙劍躍
木山中見一峯孤韋賢經學真傳授楊子文章古範模
衣鉢更多門下士向來江浙似湖蘇

目極邯鄲步裏途獨慚無力繼前趺瞻依地近公長許
汲引心勞我尚孤望道若洋洋徒自歎學文如虎未成模
百年幾見非虛語幸是陳郎早識蘇

得匏菴觀造雨簷詩輒次韻

結構親勞校短長棟材應不棄餘良平分屋角三重溜
巧借簷陰二尺涼闌外青山猶可送簾前紫燕莫愁妨
從今穩作城東客雨笠烟蓑不用將

次劉時雍獄中遣懷二首

歷盡悲歡幾歲年始知安樂是神仙途危自喜肱猶在
嫁晚非關貌不妍貝錦有詞難劇辯圜扉無事且孤眠
眼中同調知應少莫更高吟白雪篇

蓬萊通籍屢經年
暫謫人間七日仙
翼折豈妨陶夢吉
頰傷翻益鄧粧妍
休勞吏報催晨謁
却有詩情攬夜眠
世事閱來今已熟
不須重問解牛篇

送許珵之南雍

驛亭紅樹夕陽舟
十載相逢說舊遊
同學故人多擢第
異鄉孤客且登樓
庭前夜合頻經雨
江上芙蓉可待秋
會有蛟龍藏璧水
幾時雲霧起滄洲

送李進士珎還西寧

珎明遠都督胄子

幡戟門前綽楔高郎君身已着青袍龍墀有地陳三策
虎帳無心學六韜歸蜀謾誇題柱早入闕空說棄繡豪
大行雲外東西路去國懷鄉兩意勞

佩之饋石首魚有詩次韻奉謝

夜網初收曉市開黃魚無數一時來風流不鬪尊絲品
軟爛偏宜豆乳堆碧盃分香憐冷冽金鱗出浪想崔嵬
高堂正憶東鄰送詩句情多不易裁

與佩之詩有誤筆以書見問疊前韻

嘉魚詩罷客筵開
多事詩人獨未來
憶釣每看江雪畫
聞歌如隔海雲堆
釜中舊業空愁屢
濠上高談亦近嵬
愧有惡詞兼誤筆
一時叢雜待君裁

謝原博惠筭前韻

翠籠青筍一時開
為有清風竹巷來
原博居竹巷
應比秀簾龍鱗甲
漫成堆襪材有派分
洋谷襯錦無心
鬪馬嵬莫笑止人曾
煮筍久從湘客問烹裁

佩之惠筍乾自稱玉版老師謂原博冬筍為吳

山少俊疊韻奉謝

玉版山深石路開東軒真被籠盛來飽諳南國烟霞味
不入長安酒肉堆老覺禪心終苦淡瘦看詩骨共崔嵬
叢林年少休相喫脫却緇衣更懶裁

饋佩之新筭用前韻

客路逢師眼為開長安塵土去還來題詩肯附嘉魚什
作供先辭恠石堆自覺冰姿殊秀爽笑渠霜骨老崔嵬
西曹漢吏持三尺高下應勞手自裁

謝于喬送楊梅乾無詩用前韻奉索

深夜柴門闔更開，楊梅香送滿釢來。
霜乾淺帶層冰結，紅爛紛成萬粟堆。
坐愛春盤裝磊落，憶從秋樹採崔嵬。
莫教俗却先生饋佳句，重煩答後裁。

饋柑于喬世賞用前韻

凍地經寒裂，欲開南柑初載。止車來霜隨玉爪，冰絲落日照金盤。
火齊堆高價，敢論燕市踊。遠懷還憶楚山嵬，也知黃陸當時傳。
健筆應勞太史裁。

和侍郎尹公畱別韻三首

南都曾聽八仙歌

諸公有欲和高風奈遠何紫禁朝天
八仙會

清夢繞青雲回首後塵多楮虞制作唐貞觀王謝風流
晉永和而我未忘山水地送君吟鬟欲成皤

詞源衮衮正無涯况有勲名為國華江漢地通朝海路
星河人識上天槎迥看仙步離塵遠老覺君恩與歲加
莫賦春明門外別金陵元是帝王家

瀛洲無地不登仙吏省儀曹次第遷從此略施經國手

向來間却著書年亦知憂樂能關世自卜行藏豈問天
歸路不須馳傳急似聞宣室正求賢

懷麓堂集卷十四

欽定四庫全書

會要卷一萬六千六百四十四

集部

懷麓堂集卷十五

明 李東陽 撰

詩稿十五

七言律詩

體齋賞蓮次韻廉伯宮諭

後堂深閉小盆池
池上花開客已知
索賞故將狂作態
被留真以醉為期
三年約伴人應少
五月來看事亦奇

不似城東千葉主有花無酒任人嗤

送張天瑞福建叅議

樹擁層城水帶沙八閩南望是天涯民連越徼還殊俗
官似秦藩卻近家今日閭閻須撫字舊時臺省見才華
詩成不及都門駕祇為孤吟對日斜

徐竹窓挽詩

身是江南隱者流手開瓜圃接田疇縱無負郭寧求相
自有東門豈藉侯不受紅塵欺我眼誰教白髮上人頭

阪波波下多春艸一夜西風滿地秋

大雨亨大詩屢至疊前韻

急雨雄詞欲鬪淙未論陸海更潘江傾殘峽水聲猶壯
挽盡天河句未降敢謂中流堪比障故知行潦不宜艤
高歌忽斷浮雲外猶有晴虹照夜缸

碧筒酒次韻柬傅曰會中書

翠曉深處碧為筒照見池頭一丈紅別有清風來地主
巧將甘露奪天公香隨綠蟻應潛度心入靈犀已暗通

我不負花還負此不勝餘興繞堂中

少保商先生壽七十

白頭歸老荷君恩一代勲名衆所尊自古年華稀七袞
本朝科甲重三元海中仙子長生錄洛下先生獨樂園
恠見台光映東壁郎官又侍紫微垣

送焦孟陽侍講子瑞還南陽

時孟陽歸省不果

翁歸未得遣兒歸歸着襯袍當錦衣南極一星方照地
北山羣梓又成圍晉陽授簡書應在司馬題橋志不違

九日菊潭潭上水定和新酒壽重闌

焦大父九
日初度

題黃日升貢士東樓卷

勝地於人似有期層軒直覺與東宜杜陵西閣憐花冷
庾亮南樓恨月遲近市塵埃元不到背山風景卻成奇
十年著得凌雲賦祇恐君王未便知

徐用和御史席上偶成

雨後涼生別院東午窓殘暑坐來空水光倒射簷頭日
絃籟時鳴樹底風南國騷人方作賦西臺御史正乘騷

文逋未覺驅除盡颸得幽歡此會同

次韻答王世賞夜雨感懷

何處吟詩成不寐夜窓殘夢雨來時清聞木葉隨空遠
暝覺山鐘到枕遲千里闊河游子恨一年生事宴人悲
萬間大廈君須作不用歸心繞故籬

體齋西軒觀玉簪花偶作

小園紓步玉堂陰堂下花開白玉簪浥露餘香猶帶濕
出泥幽意敢辭深冰霜自與孤高色風雨長懷采掇心

醉後相思不相見月庭如水正難尋

西山十首

日日車塵馬足間夢魂連夜到西山近郊地在翻成遠
出郭身來始是閒雲裏盪胸看縹緲溪邊洗耳聽潺湲
秋風忽散城頭雨先為遊人一解顏

日照西山紫翠生雨餘秋色更分明蜃樓出霧東浮海
雉堞連雲北繞城舊識郵亭猶問路漸多僧寺豈知名
十年幾度登臨約不盡平生吏隱情

石橋沙路轉逶迤青艸園林白露時遙望好山頻駐馬
緩尋流水細吟詩梅間客到題名久雲裏僧間出定遲
也識醉翁非愛酒筆囊茶具自相隨

背倚危峯俯碧流上方臺殿出神州鐘聲過院日初午
琴響入空山更秋騎馬客尋青艸渡采芳人在白蘋洲
乾坤不盡東南眼復欲憑高一上樓

長為尋幽愛遠行更於幽處覺心清祇園樹老知僧臘
石壁詩存見客名望入樓臺皆罨畫夢驚風雨是秋聲

人間亦有無生樂化外虛傳舍衛城

野寺林深一徑通
講經臺下見生公
心於簪組元無累
興到山林便不同
坐愛鳴絃清石上
仰看飛錫墮雲中
諸峯絕頂香山路
振袂須乘兩腋風

千仞高峯十丈臺
坐看秋色轉悠哉
水流澗石叢中響
雲度山牆缺處來
洞口花深無路入
巖根樹老更誰裁
匡廬句好終難和
愧殺當年李白才

古松成蓋竹成陰
十載重來感客心
鳴葉繞空天籟遠

飛流墮地水聲深湖山勝槩此菴足城市幽期何處尋
出寺高歌重回首似聞空谷有餘音

竹籬花徑繞山開盡日無人覺往來且學山翁遊綠野
休傳御史出烏臺乍逢野客名相問慣識僧門手自推
應愛帝城風物霽詩成不為黑雲催徐用和同遊

十里平川一掌如穩騎羸馬當輕輿山家犬睡門初掩
僧寺人歸榻已虛遠興直窮高處望豪吟多在醉中書
長安飽食真無事卻憶江淮意有餘時淮南大旱

中秋飲汝學宅次韻

是日
微陰

對月啣盃莫問天人間誰是謫來仙三千界裏應同大
十二回中此最圓天柱峯高秋雨暝廣寒宮遠暮雲連
追歡不盡東樓興猶有清光入閨年

見山樓題常熟陳亞叅巷

虞山青近海東頭正對元龍百尺樓半世間身剛得隱
四時佳景更宜秋屐曾躡後猶餘齒簾為看來懶下鉤
倚遍曲闌人不見斷雲飛鳥共悠悠

慈恩寺偶成

城中第一佳山水世上幾多閒歲華何日夢魂忘此地
舊時風景屬誰家林亭路僻多生草浦樹秋深尚帶花
猶有可人招不得詩成須更向渠誇

送太常楊公還南京次韻

時楊公掌尚寶司事

菊花時節共登臺南寺曾為此客陪醉後音書難屢寄
別來詩卷定頻開吳船最穩纔經月燕酒雖醕亦滿杯
今日送君如送我可能無意暫徘徊

哭女菱

夜堂嬌語坐生嚦
睂目分明畫裏身
誰遣一朝為骨肉
極知千古共埃塵
回頭尚覺呼名誤
入想猶疑見面真
漫撫哀琴不成調
他年空憶辨絃人

喬師召編修輓詩二首

禁林仙籍久通名
我里君門數送迎
身病每勞分藥裹
官閒時復對棋枰
此堂萱艸三年夢
東國鱸魚萬里情
可是得歸歸便了
竟將勲業負平生

菊徑松園春復春
醉中光景病中身
生存遺業分諸弟
死有餘恩戀老親
富貴不成空骨相
文章無用祇埃塵
玉堂今夜薇花月
曾照當年伴直人

雨中種竹

石欄沙路雨聲乾
為欠蕭蕭一兩竿
深帶土膏從地底
暝移茅屋過江干
方於辰日依時種
影待晴天拂翠看
試倚蓬窓聽踈密
布袍沾盡不知寒

茅屋松聲

艸閣斜臨野水隈
松聲時過石窓來
飄蕭忽散飛空雨
犖確長驚殷地雷
清和鳴絃生白石
遠隨行杖出蒼苔
詩人聽此難成寐
醒盡虛堂昨夜杯

夜窓聽雨

瀟瀟殘雨入深更
半灑疎窓半拂楹
芳艸池塘應有夢
落花庭院不勝情
聽疑野寺昏鐘遠
望憶江船夜火明
明日曉晴須出郭
葛衣藜杖一時輕

柳岸垂綸

釣魚磯上晚風多拂拂垂楊渺渺波行過酒家來別岸
坐移林影下前坡聊將短日供長線又見新條綰舊蓑
老去祇應家在此不須盤石更垂蘿

繆徑楊花

漠漠楊花帶遠天舞如輕雪繆如氈徑當僻處隨人到
風向多時著意偏地濕似沾前夜雨日斜猶颺隔溪烟
春光到此真須惜莫愛床頭沽酒錢

經廢道院

偶從樵客看棋回
回首仙宮跡已頽
歲久荒碑橫蔓艸
日長飢鶴啄蒼苔
空聞河上仙翁去
不見山陰內史來
更說前朝封禪地
玉符金秘有人開

除夕書懷

壬寅十二月時
已買太僕巷屋

夜坐高堂席屢移
老親歡在紙
嬌兒貧堪苜蓿堆盤少
長覺屠蘇到口遲
底有鶯花催客夢
早看冰雪與春辭
明年又卜新居去
應憶城南守歲時

次韻寄答若虛二首

懶向江湖問楫師。江南江北兩相思。鳩巢近報移來宅。
鴈札遙傳寄到詩。城市行蹤嗟我在。山林性格祇君知。
如今舊社無新興。不似星堂夜戰時。

西郊雲氣滿林端。卻恠長安雨易乾。溽暑中人貪睡久。
軟塵欺面覺行難。星霜道路天涯隔。冰雪形容夢裏看。
翹首望君君不見。月明無限海波寬。

馮佩之秋官得男用瓜祝韻

時佩之自江西使還

佳音南報驛程賒。千里歸期正及瓜。噴案早占釵玉墜。

佩之往歲詩云有就床親正錦棚斜西京舊德于公第
人笑倒玉釵斜

江左清風絡秀家若遣皇華能再返此郎應已解呼茶

次韻寄答方石二首

王河楊柳幾春風回首長安是夢中別鴈有時傳塞北
愁雲昨夜起天東應懷野客歌招隱肯效文人作送窮
我病欲攻無藥石愧將交誼託微躬

藝苑詞垣二十年離情不似十年前綠波南浦江淹賦
白雪西山杜甫篇醉裏功名心尚在老來山水性俱偏

春風漫作金陵夢卻望天台更渺然

齋居日待諸同官不至

三日齋居到每先病餘欹坐不成眠硯池曉滴晝微露
土鉢春回榦榦烟滿座清風陶穀茗半庭遲日李程輒
玉堂官况從來冷不為詩情減少年

再經天涯

新築湖堤面面平亂橋欹岸失縱橫輕鷗著水驚還堯
馬緣溪戀復行舊日鄰家今幾在別來光景共誰爭又

勿不盡逢僧話剛說無生便有情

次太子太傅余公登鎮朔樓韻三首

邊城勝槩拱皇都
傑閣東來眺望孤
落日平沙隨地遠
澹烟飛鳥入空無
中原將帥歌周伐
北土山川盡禹敷
欲識老臣經濟畧
武侯營陣有新圖

鼓角聲高起畫簷
坐來霜鬢幾莖添
三邊戍久衣重換
二月寒多草尚纖
胡地牧情嗟易變
漢家兵食恐長淹
知公不似征西帥
醉下南樓月滿簾

此來風物感重遊又上孤城百尺樓白骨川原遺舊恨
荒田禾黍動新愁華夷地仰威名重臺省官兼位望優
從此黃河南下路不教胡馬飲長流

昌平學宮和劉諫議祠韻

誰為君侯續舊祠眼中人事幾推移登科士有同朝愧
憂國心惟異代知長路屢曾經此地高風真足壯吾詩
不須感慨深懷古風雨催人鬢易絲

送左行人使琉球

鯨波淼淼接天遙海國塵空瘴癘消貢賦遠通中服地

冊書元自大宗朝南船去日占風信

凡使海國以北闕冬至日開洋

北闕

歸時望斗杓

海舟惟視北斗為的

但使行囊無薏苡嶺頭銅柱不

須標

聞世賞太史誦夏提學正夫後園席上二首次

韻分柬

回廊欲盡到還通十笏書齋一徑東坐久幽花猶帶雨
酒醒高樹忽生風鄉園近接官仍近館舍同遷地不同

聞道詩筵多好客夜來磬際有飛鴻

浙東冠蓋屢追隨三日深杯醉不辭踵接尚慙登第晚
神交長恐渡江遲觀中桃樹誰應種笛裏梅花可奈吹
一見好詩還技癢欲顰無力效西施

再疊答夏提學

十載江湖夢寐通使車重綰寺門東未傾李白金尊月
先生王郎玉塵風楚刺漫來何日到郢歌工後幾人同
相逢莫更飄然別指爪須留雪上鴻

到處惟應筆硯隨私逋官籍恐難辭耽詩癖在身長瘦
學道心勞歲恐遲已飽東方猶漢粟未逃南郭尚齊吹
向來堊質緣君減斤斧何因得重施

次夏提學韻二首

詩家餘韻遠相沾不見高軒駐短簷花落每教空掃徑
客來長為誤窺簾僧門漫說三生改人世難逢四美兼
若遣錦囊隨綠筆艸堂風月價須添

衣袖歸時雨盡沾卧聞涼葉響虛簷鳥情幽寂將依樹

苔意夤緣欲上簾
靜裏祇應閒尚在
病來長與懶相兼
讀書自笑成何事
細取蟲魚幾字添

世賞席上次韻夏提學

坐久莓苔欲滿庭
屐痕猶帶雨時青
京塵畫斷車馬迹
山色晚開雲霧屏
鸚鵡籠深空望眼
鳳凰巢近有栖翎
相思只隔西垣夜
長恆東堂夢易醒

謝王世賞移竹次韻

俗居無計避塵氛
西郭濃陰遠見分
幸有竹看休問主

苦無鄰乞竟煩君天應不愛城頭雨地許長留石上雲
十日肩輿猶未過曉風簾箔又斜曛

厓山大忠祠詩四首

國亡不廢君臣義莫道祥興是靖康奔走恥隨燕道路
死生惟著宋冠裳天南星斗空淪落水底魚龍欲奮揚
此恨到今猶不極厓山東下海茫茫

汴城杭郭總丘墟三百年來此卜居海內山河非漢有
嶺南民物是周餘行宮艸艸慈元殿講幄勤勤大學書

辛苦相臣經國念有才無命欲何如

北風吹浪覆龍舟溺盡江南二百州東海未填精衛死
西川無復杜鵑愁君臣寵辱三朝共運數興亡萬古讎
若遣素王生此後也須重紀宋春秋

宋家行在日南遷鐵騎長驅百萬鞭潮海有靈飈佑敵
江流非慙枉稱天廟堂遺恨和藩策宗社深恩養士年
千古神州須雪恥我皇親為定幽燕

送平江伯陳公漕運還淮安二首

賢勞三世服王家千里山川路道賒周甸土中南北貢
漢河天上往來槎晨揮玉塵風生座夜拂銀燈劍有花
聞說江淮多故老風流皆作祖侯誇

朝廷漕運仰南東百里官河屬會通勝國封疆還薊北
西山泉派出城中舟車坐惜千金費畚鍤虛勞累歲功
猶有腐儒憂國念欲將經國問元戎

遇雨後送鏡川楊先生謁陵次去秋見憶韻二

首

春祠秋祭總期程
陵典分官次第行
苦雨途窮憐我拙
停雲詩好荷公情
倦遊丘壑心還在
歷盡波濤夢亦驚
今日不堪還北望
樹頭風鶴有餘聲

聞說登臨興渺然
祇應幽賞勝孤眠
遙知水涉山行地
正及花明柳媚天
塵世年華須自惜
詩家風景更堪憐
閒官亦有遊春夢
緩逐鶯聲送馬鞭

再經西涯

拂樹穿雲二里堤
綠陰深處鶲鳩啼
背城古路車塵少

隔岸人家酒慢低清愛野僧來紫衲醉扶童子當青藜
相逢却恐知名姓不向慈恩寺裏題

送鄧大叅宗器之山東

談笑蒼生在掌中使君才是出羣雄縣分南國絃歌滿
郡領西夷節制通鏡裏雪添新鬢白殿頭雲擁舊袍紅
循良故是藩侯事莫道齊邦本上功

次柳文範中書閣直賞雪韻三首

雪滿園林物不知賞心卻與雪相期窺簾詠絮誰稱絕

煮石烹茶未當奇玉宇空寒高易到碧甃清響靜還宜
柴門擬學昌黎閉贏得王郎鳳沼詩

貝闕瑤壇路不分眼看飛雪亂如雲高城暝帶朝鴉色
小苑斜坡獵騎羣冰溜響簷醒短夢冷花吹面拂殘醺
自應瓦礫難為質故乏瓊瑤可報君

遙從天上雪中來不信人間滿戶埃積久漸看隨地起
舞餘飈愛逐風回楚江蓑笠孤舟客吳地園林半樹梅
莫向此時誇此景有誰吟對玉堂杯

世賢雙生一子夭死慰之以詩

城東瓜熟子離離長向西園記送時正愛春風聯蒂好
坐愁寒雨一枝垂人生得意難為樂造物何心亦妬奇
從此柯條終遠大為君重誦古縣詩

每從奇骨辨頭顱知是徐卿第二雛屬對早能通四六
讀書何但識之無渥洼水遠神駒化阿閣巢深彩鳳孤
聞說生男重有兆夜來呼彩得雙盧

齋居東青谿先生

玉堂冠佩託英遊老大相看尚黑頭後植庭松柯葉改
舊題詩壁姓名留仙人掌出雲初散太乙燈來夜轉幽
惟有清歡并好語多情難為故人酬

謁陵憇清河舊館有感

路出沙堤向艸堂止歸曾此駐行裝風前熱火烟生面
夜半開門雨到床今日閭閻宜富庶舊時僮僕尚蒼黃
人生剩有悲歡地何必他山與故鄉

過沙河有感

幾家茆屋住荒洲風景淒然感去秋沙壅斷橋還舊路
水藏深澗有橈舟虎談在耳神猶動魚葢傷心骨未收
對此不堪懷故侶野烟溪日重回頭

重宿劉諫議祠有感

曾照荒燈宿古祠祭餘山路獨歸遲誰教夜雨移床後
正值秋風破屋時豈謂人生非夢幻極知平地有欹危
感今懷古無窮意只許前朝諫議知

昌平城北道中有感

十里溪橋野色分平沙不動水沄沄聽餘空谷猶聞鳥
行到深山不見雲勝事園林看入眼迷途風雨憶離羣
城陰舊路元非遠夢覺齋廬日未曛

賦得西湖送張公實少叅歸浙江

路指三天轉六橋盛時風景勝前朝無山不繞湖邊寺
有水皆通海上潮部使隨星馳漢節騷人乘月弄吳橈
因君卻省曾遊地醉倚高樓望泲寥

初赴郊壇看牲

奏書初出太常卿隔日分官次第行騎士擁塵隨輦道
犧人投牒報牲名樓臺地遠稀聞漏燈火門開夜到城
歸向玉堂題笏記坐聽金鑰待天明

慶成宴初預殿坐

大官分胙出郊牛又向宮筵侍冕旒瞻拱正當天北面
班行初坐殿東頭斟來琥珀盃頻滿舞罷狻猊隊始收
正是君臣修省日感恩無地答神休

鍾御史同追輓詩

少海驚波竟隕身豸冠曾觸驪龍鱗生無赭色居臺省
死有丹心質鬼神五夜虞淵終日見百年宰木再回春
南宮顚老英靈在地下惟應兩故人

雪後早朝

六日長安雪滿城五更鐘鼓一時晴水精宮冷雲猶凍
鶼鷀樓高月正明朝馬不嘶金勒靜院燈無影玉堂清
祇應天上寒如許恠底人間夢不成

郊祀前一日齋居候駕

石橋瓊尺倚雕闌樹裏行宮接泰壇盡地龍顏瞻九陛
兩班鶴步引千官旌旗滿路春雲擁鼓角連城曉氣寒
為報雨師休灑道香塵先已避鳴鑾

初預郊壇分獻得南海

南海分壇位嚮東石門深鎖象龍宮歸虛下有通靈地
廣利中含濟物功萬里炎威驚變雪一春佳兆喜占風
儒臣詔許供牲幣愧有微誠佐聖躬

鏡川楊淑人壽詩

鹿鳴歌裏和桃夭白首相看似一朝清俸屢沾三世業
內班新綴兩宮朝門臨杜曲天相接膾出蓬池手自調
為報平反終有喜壽顏春酒任紅潮

祀陵懷青谿學士

君居禁署應思我我在山城更憶君藥裹自煎巖下水
緘書誰寄隴頭雲歸鴻影落當空見警鶴聲高半夜聞
長恨茲遊不同賞一年春色又平分

鏡川翰長以劉諫議祠詩見託竟忘代致以詩

謝之


曾勞詩卷付蒼頭一笑空囊竟莫收忘事師丹猶少壯
致書殷羨敢沈浮誤驚神物空中化卻愧明珠暗裏投
已向荒祠留素壁重來須待碧山秋

喬主事歸自西山聞南屏隱甕山自菴漫寄一
首

靜倚巖扉自詠詩豈知朝市有人知山林入後應嫌淺
蹤跡看來頗近奇滿目塵埃須笑我一川風月合分誰

蒼苔白石湖邊路亦欲相尋未可期

懷麓堂集卷十五



總校官庶吉士臣張能照
校對官檢討臣龔大萬
謄錄監生臣李士勲